

## **Forretningsorden for styret ved Høgskulen på Vestlandet**

Vedteken i styremøte 01/18, torsdag 1. februar 2018.

*Styret sitt ansvar og deira oppgåver er nærare skildra i [lov om universiteter og høyskoler, kapittel 9 og 10](#).*

### **Innkalling**

Fullstendig innkalling med saksliste, saker og alle vedlegg skal vere styremedlemane i hende seinast seks dagar før styremøtet, med mindre det finst gode grunnar til at utsendinga kan utsetjast. Offentlege sakspapir vert lagt ut på nett same dag, og hovudtillitsvalde vert varsla på e-post.

Saksliste vert fastsett av styreleiar. Saker som vert ført opp på sakslista etter utsending må godkjennast av eit samrøystes styre ved møtestart.

Eit styremedlem kan be om å få ei sak ført opp på sakslista. Oppmodinga må vere skriftleg, og vere styreleiar i hende seinast 14 dagar før møtedato.

### **Styret sine medlemer**

Styremedlem og observatørar med tale- og forslagsrett har møteplikt, og kan ikkje melde forfall til eit styremøte utan gyldig fråvere. Forfall til styremøte skal meldast til styresekretariatet so tidleg som mogleg. Sekretariatet kallar inn personleg vara og tek ansvar for at denne får alle naudsynte styrepapir.

Observatørar med tale- og forslagsrett er å rekne som fullverdige styremedlem utan røysterett. Utanom røysteretten har desse dei same rettar og plikter som andre styremedlemer.

Styret sine medlemer har røysteplikt. Det er ikkje høve til å røyste blankt anna enn i val.

### **Offentlegheit**

Styremøta er opne for offentlegheita, men berre styret sine medlemer og faste observatørar har talerett. Styret kan vedta å lukke møtet dersom saka som skal til handsaming krev dette.

Votering i tilsettingssaker og andre saker unnateke offentlegheita vert ikkje protokollført.

### **Vedtak**

Forslag som vert fremja i løpet av styremøte skal vere skriftlege, signerte, og overlevert til styresekretær for protokollføring. Forslag om avvising eller utsetjing skal opp til votering so snart dei har vorte fremja.

Styret avgjer om det skal gjennomførast prøvevotering. Prøvevotering vert ikkje protokollført. Ved realitetsvotering skal det mest ytterleggående forslaget røystast om fyrst. Forslag kan stillast opp mot kvarandre, og forslag kan grupperast.

### **Protokoll**

Forslag til protokoll vert sendt ut til møtedeltakarane med ein merknadsfrist på sju dagar. Dersom det ikkje er stor usemje om innhaldet vert protokollen då førebels godkjent.

Protokollen vert lagt ved som vedlegg til innkalling til neste styremøte og endeleg vedteken i samband med handsaminga av den saka.